



PRESTASI

Catat nilai jualan
RM142.7 bilion pada
September 2023

KUALA LUMPUR

Perdagangan borong dan runcit Malaysia mencatatkan nilai jualan RM142.7 bilion, meningkat 6.5 peratus tahun ke tahun pada September 2023.

Menurut Jabatan Perangkaan Malaysia (DSOM), nilai jualan menokok 0.1 peratus berbanding Ogos 2023 dan bagi perbandingan suku tahunan, perdagangan borong serta runcit mencatatkan jualan RM424.9 bilion pada

suku ketiga, tumbuh 6.8 peratus tahun ke tahun.

Ketua Perangkawan, Datuk Seri Dr Mohd Uzir Mahidin berkata, peningkatan 6.5 peratus tahun ke tahun pada September 2023 disumbangkan oleh subsektor perdagangan borong yang meningkat 6.9 peratus atau RM4.1 bilion kepada RM64.2 bilion.

"Perdagangan runcit juga berkembang, mencatatkan 5.9 peratus atau RM3.4 bilion kepada RM61.1 bilion, diikuti kenderaan bermotor dengan peningkatan 7.0 peratus atau RM1.1 bilion untuk berada pada RM17.5 bilion," katanya dalam kenyataan mengenai Prestasi Perdagangan Borong dan Runcit Malaysia, September 2023 yang dikeluarkan pada Khamis.

Menurutnya, peningkatan marginal 0.1 peratus berbanding bulan se-

belumnya, disokong oleh perdagangan runcit, berkembang 0.9 peratus atau RM0.5 bilion, diikuti perdagangan borong dengan 0.5 peratus atau RM0.3 bilion.

Namun, jelas beliau, kenderaan bermotor merosot 3.6 peratus.

"Dari segi prestasi mengikut subsektor, pertumbuhan 6.9 peratus tahun ke tahun bagi perdagangan borong disumbangkan oleh lain-lain pengkhususan jualan borong yang meningkat RM2.0 bilion atau 8.6 peratus kepada RM25.1 bilion.

"Mengenai subsektor perdagangan runcit, kenaikan 5.9 peratus tahun ke tahun bulan ini disokong oleh jualan runcit di kedai bukan pengkhususan yang meningkat 8.9 peratus atau RM1.9 bilion kepada RM23.2 bilion," katanya. - *Bernama*